

太醫院志

太醫院誌序

掌故之學其來舊矣自遷固而後代有作者史不絕書然誌傳記述之編類足為修國史者參考取材之藉則掌故之學尚已後世留心掌故之士於一代之典章文物繁徵博引勒為成書雖其間體例不同著錄各異然皆有闢典制之作斯亦撰修國史之所重也我朝鼎盛以還制度文為燦然大備鴻篇巨製類躋於作者之林抑何其卓犖而閑遠也往者元讀清會典竊見採集雖詳卷帙繁夥覽之匪易及讀綱鑑

擇言諸書每歎其有闕掌故因思元奉職太醫院歷
數十年矣其間因革典要可徵引事實者茲復不斲
不以此時網羅散帙日月逾邁迄付闕如是誰之咎
亦既數數發憤思以自任而學識謏陋志慮不專在
蒐鮮就彌用增忤寅友任子修如閱覽多聞長於記
述所為太醫院誌篇目蘊然凡所攷歷彌多搜討風
雨鶴鳴無間編述非志毅而力勤心果而才敏者其
孰能與於斯任子之學未見其止世有留心掌故心
焉修史者必能衡而鑒之其亦取材於斯誌也可

時夏歷癸亥冬月張仲元序於如不及齋

--	--	--	--	--	--	--	--	--

弁言

丙辰清和拙著難經筆記時方脫稿偶於字紙笥中
得太醫院記事之草蓋庚自入院以來迄今二十有
六年兩辦院事得見九朝檔案及特頒

大清會典古今圖書集成等書凡與本院相關者均於
公暇錄之誠以二百六十年中時遷事異即徧檢冊
檔尚不能盡悉其原况太醫院當庚子之變衙署劃
入使館簡編遺失過半欲求往事茫無以應且碌碌
下質本乏案牘之材昕抄夕錄當年藉為辦公之資

今雖却差退置雲煙過眼然衷曲思舊人有同情因
依抄稿而成書名之曰太醫院志尚望後人稽古者
有以諒之

時在丙辰季夏上浣六日

北平任錫庚修如甫自題於水澤腹堅室

太醫院志目次

職掌

官名

學位

品級

額缺

殊恩

特簡供奉

內直供奉

外直供奉

駐署

辦公

醫學

製藥

隨扈

隨侍

特派差務

奏派差務

咨派差務

徵取

考試

升遷除授

章服

俸祿

考滿

京察

衙署公所

先醫廟制

昭穆次序

祭禮略

聖濟殿

藥王廟

銅神

土地祠

職掌

太醫院官無分滿漢職掌皆同其宗室覺羅各項旗人均隨入漢員一律任用職專診視疾病修合藥餌國初依明制術分十一科曰大方脈曰小方脈曰傷寒科曰婦人科曰瘡瘍科曰鍼灸科曰眼科曰口齒科曰咽喉科曰正骨科曰痘疹科嘉慶二年以痘疹科併入小方脈咽喉口齒共為一科謂之太醫九科六年奉

旨以正骨科劃歸上駟院蒙古醫生長兼充道光二年奉

旨鍼灸一法由來已久然以鍼刺火灸究非奉君之所宜
太醫院鍼灸一科著永遠停止同治五年御史胡慶
源奏整頓醫官以正醫學經禮部會同太醫院議定
以太醫院教習廳限於經費自道光年以來廢弛幾
三十年今為整頓不但款項難籌即人才亦不易得
勉就該院已圯教習廳略加修葺暫立五科即大方
脈小方脈外科眼科口齒科是也蓋傷寒科婦人科
併入大方脈外科即舊之瘡瘍耳定制太醫院直廬
常川備有瘡瘍眼科口齒咽喉各科應用之丸散藥

膏藥綫等物以便隨時取用自道光年本院藥庫歸併內務府管理咨取不易凡各科應需之藥均由入直各員捐廉自備咸豐兵燹以後俸祿核減力難自給從茲各科均無特用之藥迄於今日未嘗復舊

官名

曰院使曰院判曰御醫曰吏目此

國初之制也醫士本係學位順治初年有

特簡入直者給與八品筆帖式冠帶謂之冠帶醫士六年特簡醫士給與八品冠帶奉

旨隨同吏目入直謂之冠帶吏目即後之頂戴吏目旋奉
旨增設預授吏目雍正八年奉

旨以實授吏目為八品吏目以預授吏目為九品吏目宣
統元年經內閣會議政務處奏准改八品吏目為七
品吏目改九品吏目為八品吏目以醫士為九品實
缺官

又已未十一月奉

旨派張仲元督辦清查管理太醫院佟文斌協辦清查管
理太醫院秩在院使上

學位

凡初進醫生令其隨時取具六品以上同鄉官印結
旗籍取具該管佐領圖結均仍取本院官保結由首
領官查明粗知醫書通曉京語加結呈堂面為考試
准其入院聽候肄業是謂醫生挨名傳其到院肄業
者曰肄業生舊例三年期滿經禮部考試取中者曰
醫士不取者仍照常肄業以待再考順治九年禮部
奏准醫士定額四十名月給銀米在院供事糧生二
十名供繕寫切造醫生二十名修合藥餌由是凡肄

業一年以上且季考三次一等者遇有糧生缺出籤掣申明禮部充補雍正八年奉

旨添設糧生十名并改糧生曰恩糧生自是遇有醫士缺出由院籤掣申部充補不復考取矣醫生例准報捐貢生否則不得捐納各項實官光緒三十四年奏准別立新醫學館四年畢業曰最優等學生優等學生中等學生

品級

國初各官品級滿漢間有不同康熙九年改歸畫一太

醫院院使正五品院判正六品御醫正八品吏目從九品是年題准考滿已停御醫吏目升轉無期許服六品冠帶仍照原品支俸十年奉

上諭太醫院御醫准其服用六品冠帶原品給俸其吏目各員仍候擇尤賞給不得援以為例雍正七年奉

旨御醫著定為正七品六品冠帶並准其服用貂皮挂數珠八年奉

旨以實授吏目為八品吏目以預授吏目為九品吏目經吏部議定為從八品從九品醫士原係學位自順治

年間屢有給與八品冠帶者雍正八年奉

旨定為九品冠服與實缺官一體加級給封宣統元年十月
二月欽奉

諭旨太醫院院使著定為四品又奉

諭旨院判改為五品御醫改為六品改八品吏目為七品
九品吏目為八品以醫士為九品實缺官經吏部議
定院使院判御醫為正四正五正六品吏目醫士為
從七從八從九品

額缺

太醫院俱漢缺屬於禮部正官院使一員左右院判各一員屬官御醫十員首領官吏目三十員乾隆九年

特派滿洲大臣一員為管院大臣以為領銜畫諾凡百公務皆自行辦理不復申詳禮部嘉道時間有派二員管院者雍正元年添設御醫五員道光二十三年裁御醫二員順治六年設預授吏目十員十八年裁吏目二十員康熙九年復增吏目二十員十四年裁吏目十員雍正八年奉

旨以實授吏目為八品吏目以預授吏目為九品吏目定額各十五員道光二十三年裁八品吏目二員九品吏目二員順治九年禮部奏定醫士四十名道光二十三年裁醫士十名宣統元年定為醫士三十二員順治九年奏定糧生二十名雍正八年奉

旨添糧生十名改糧生曰恩糧生道光二十三年裁恩糧生十名順治九年定切造醫士二十名乾隆三十五年裁切造醫士三名

殊恩

凡本院官有保和效力勤勞素著者或加銜或給賞俱出自

上裁康熙十七年十二月二十五日奉

上諭皇太子出痘痊愈朕心欣悅醫官甄國鼎候選知縣傅為格侍奉調理小心勤慎有應優加獎啟以示加恩著吏部議奏雍正四年奉

上諭太醫院官先年出外甚是清苦嗣後隨扈出行如何優給之處著該部議定以為常例八年奉

上諭此次制定醫官品級係為按班升轉其有奉旨加銜

加俸賞戴翎枝者不拘此例同治十一年

慶典禮成太醫院奏侍值各員請分別獎敘十一月初六日具奏本日奉

旨依議

國初以來幾三百年太醫官特蒙

殊恩者代不乏人順治年間即有頒賞

內府珍物者康熙二朝以得賜

御筆屏聯為最榮乾隆時醫官吳謙歷升列卿擢任部堂

嘉道以後由院使院判特加卿貳卿銜者尤多同治

京帝覽其遺疏深為悅惜賞銀治喪伊子壽榮由特用主事晉秩員外八閱月院使懸缺不忍授人此外如院判李德昌咸豐時以醫士隨扈於熱河蓋庚申之變倉猝北行徒步百里不敢告勞庚子西巡匹馬相隨是時醫官隨侍者僅昌一人積勞成疾久不入直病則遣官存問歿則賞銀治喪祇以身後蕭條月頒內

大醫局記
七
帑贍其妻子其子特用為郎中此皆太醫受恩之尤者也餘則不及備載

又癸亥八月院使趙文魁奉

旨賞給頭品頂戴總管太醫院

特簡供奉

明時太醫院官非擢任御醫不得侍直內廷清制則不然順治初年即屢令本院將閣署官員繕單呈

覽親為點派官無崇卑一體入直是為特簡供奉直宿於

乾清宮東

日精門南之配殿為宮院內祭饗

三皇儲藥宿醫之所謂之

御藥房凡醫官入直日賞御膳月給素燭冬給木炭後
之入直者雖不必在其地而職分如舊日侍

禁廷以備顧問非僅診視已也

內直供奉

內直供奉者奏派之宮值是也晝侍外廷夜直宮內
職專診視較之特簡備顧問者固有繁簡之別吏目
以下各員皆得充任要在品端術精所負之責亦云

重矣

外直供奉

外直供奉者照例輪充之六值是也東藥房在

禁城左掖西藥房在禁城右掖西藥房以院使院判御
醫為班領以各吏目分班輪直東藥房以御醫為班
領以吏目醫士分班輪直兼備

特遣凡此官員均於每月逢二逢七日進

東宮請安康熙以後不封太子此禮遂廢道光元年奉
旨太醫院堂官御醫均著入直東藥房其西藥房每日派

吏目醫士二員備差二年奏定西藥房仍派御醫一員領班咸豐以後日僅一員所謂六值者

寧壽宮

慈寧宮

乾清宮

鍾粹宮

壽康宮

壽安宮恭備六處

召命是也道光末季別謂公值者專供繕寫公牘六值者

專診總管內宦御前內宦嫗嫗女子祭神房女官昇
平署內宦六項雜差為時無久即已漫廢與舊制之
官值六值名同實異

駐署

國初依明制太醫院除院使院判御醫在御前行走其
吏目各員均輪直駐署仍各派官人在午門朝房聽
差遇有

特派奏派各差從內抄出隨時由官人回署報知各該員
謂之報朝順治四年以後因醫官入直者衆不敷駐

署奏明以外直各員兼備差遣仍委首領官二員庫
官二員輪班駐署收發文件兼應傳差急務舊例太
醫院設有奏派教習雖常川駐署然專課諸生誦讀
康熙二十三年題准太醫院教習與首領官等分班
駐署以應公務道光年間欸難時領房間傾圮既無
師生課程亦無官員駐署迨至同治年間始派老成
司官一員常川駐署收發文件

辦公

太醫院為

朝廷執事官本無公務可言然升遷除授考滿

京察告假丁憂各項事故閩支俸銀俸米月銀月米津貼公費奏銷藥價祭祀

三皇各項考試凡諸事件莫不與各部院衙門文牘往來國初定於本院首領官內揀派熟諳公務者奏派二人堂派二人一年更換嗣以熟悉情形差滿輒留一年之期久同虛目乾隆十年奉

上諭太醫院奏派接替辦事官一摺著管院大臣酌核派委自是以後更換辦事官皆不入奏

醫學

舊制於御醫吏目內選取學識素著者二員令居東藥房教習御藥房太監讀醫書光祿寺給厨役供膳由本院月給津貼年終考試畢奏給師生獎賞乾隆二年奉

旨裁撤本院亦設有教習廳於御醫吏目內擇品學兼優者各二員充任常川駐署教習肄業諸生並批閱未授職醫士月課凡醫官子弟均准保送教習廳課其誦讀迨道光年間欸絀事廢三十年不聞書聲同治

五年御史胡慶源奏整頓醫官以正醫學經禮部會同太醫院奏覆始於本院復設教習廳改名醫學館於司官中揀派教習三人收掌三人并不駐署僅令醫士恩糧肄業生朔望交課而已光緒三十四年奏設新醫學館略仿各省學堂之意以院使院判為管學派司官二人為教習其監學庶務稽察書記各一員除管學餘皆駐署於舊肄業生內考選二十名期以四年畢業欸由各官津貼中捐集壬子後不克續辦矣其舊醫學館始終仍別樹

製藥

凡烹調御藥本院官請脈後開方具本奏明同內臣監視每一劑備二服合為一服候熟分貯二器本院官先嘗之次內臣嘗之其一器進御亦有將方奏明交與內藥房按方烹調者乾隆五年以後凡藥均由內臣烹調自是醫官不複製藥舊例各直省出產藥材地方每年解納本院生藥庫收貯委醫官驗辦優劣其出入皆申禮部每遇內藥房取用藥材行本院申明禮部開庫照交如有不足用時由本院給價採

買年終由各省藥材折色中報銷交進俱以生藥材由內藥房之醫生切造炮製於吏目中選委二員為生藥庫庫使專管辦買藥材典守庫務二年更換任滿以應升之缺升用如著有勞績另由正官奏獎倘代替乏人仍令舊官管理康熙三年以後庫使專派醫士順治十六年以藥庫專歸本院出入無申禮部十七年題准派太醫院官一員兼攝庫務頒給印信并設庫役十名巡邏看守康熙三年以藥庫復歸禮部兼轄庫印亦繳還禮部是年又定直省歲解藥材

折色錢糧著戶部附庫收貯道光以後各省除例貢藥材竟交內務府其所產藥材均改解折色由內務府隨時採買太醫院之藥庫從茲無用矣

又癸亥六月奉

旨以

乾清宮御藥房

永和宮壽藥房併為一事改組

上藥房派院使趙文魁綜理一切御醫任錫庚吏目楊世芬為經理醫士梁福恩恩糧朱曾煜孫煜曾為班

領吏目何廷俊蘇施霖醫士白永祥為班員督率切造醫生修合藥料烹調湯液以供

上用其

壽三所藥房亦著入直醫官就近兼任是年八月奉

旨派院使趙文魁兼管內務府之

御藥房御藥庫九月

派御醫任錫庚兼充

御藥庫掌印佟成海兼充幫掌印吏目劉文英兼充庫掌旋經內務府奏准以前派之總辦幫總辦兼

行各員一律撤銷留主事一員職在幫掌印之次

隨扈

本院凡隨扈

聖駕行幸有奉

旨點派者有堂官奏派者有按班輪派者俱給夫馬車輛
帳房需用等物除往返途中外每日於光祿寺支領
米肉柴炭

隨侍

凡遇

聖駕駐蹕

園庭仍照在大內一律入直此外

壇廟各差宿

壇者堂官一員辦公官一員隨往直宿其不宿之

壇差只院使院判隨班迎送並不隨侍

特派差務

舊制王貝勒公主額駙及文武內大臣請醫視疾本
院奉

旨差官前往其治療可否皆具本覆奏外藩公主額駙及

台吉大臣有疾請醫亦奉

旨差官前往由部給驛馬皮箱繩氈油單等項其藥材於
內藥房支領或由藥庫給發請

旨遵行回日銷算乾隆年間以奏請視疾為贖令在京王
公公主額駙等自行延請其王公額駙勳舊國戚滿
漢大臣有患病遣醫診視者出自特

恩外藩王公仍依定制然從此蒙古王公非病重而值年
班不敢輕於請醫道光末季每令理藩院查明即准
免年班自是請醫一事不復見矣遣將出師准其隨

時奏請派醫得

旨俞允由禮部堂官選派太醫院官二員具題馳驛前往
并遣兵部官一員送至軍前康熙二十四年奉

上諭黑龍江墨爾根地方緊要着太醫院遣良醫二人前
往一年更換雍正十三年奏裁同治年間

特派御醫汪兆鏞赴江南各省採買藥材光緒末年派恩
糧生陳鑑赴上海購買牙科藥料

奏派差務

國初以來每直京師多疫由步軍統領奏請

恩施醫藥惠濟滿漢軍民人等得

旨後由本院開單奏派順治十一年奉

旨於景山東門外築房三間由禮部奏派太醫院官施醫
給藥康熙二十年經五城御史奏准設廠十五處於
五城地方派僉都御史督同五城御史發內帑辦理
施醫由太醫院奏派每廠醫官醫生各一人二十一年
改設東西南北四廠照舊辦理奉

旨以為常例乾隆五十八年奏裁

咨派差務

文武會試由禮部兵部咨行太醫院文場派官二員
武內場派官一員入場供事差畢與各執事官一同
赴宴由嘉慶丙辰科以後專派醫士順治八年刑部
設常差醫士一名每月由部給發藥價銀米期滿六
年咨回本院升預授吏目所差醫士如本院需用隨
時咨取回署遺差另行咨派康熙二十三年刑部奏
准添派醫士一名嗣以此差醫治病犯多不樂為往
返咨商准以醫生咨充然既非醫士自不得升任吏
目光緒年間刑部奏准仍專咨派醫士三年期滿以

九品吏目即補宣統元年該部奏准醫官作為本部實缺此次即以太醫院前派之王德濬改補以後由部自行遴選毋庸由院咨取順治十一年設督捕應差醫士一名制與刑部同未幾裁撤

徵取

雍正元年

上諭良醫須得老成經歷多者但伊等多年老憚勞嗣後果有精通醫理療疾有效者著京外大臣保奏准其子弟一人隨同來京著大學士九卿議奏遵

旨議定令九卿各部院堂官暨直省將軍督撫都統副都統提督總兵各舉灼知之年老醫生不拘有職無職統由該地方官派員護送來京由禮部太醫院面為考試即行引

見八直供事有職者加予封典優給俸祿無職者留院授職外仍將伊等隨行子弟如有現任官以應升之缺即用候補候選者以本班即用貢監生員以府經歷即用布衣以吏目典史即用道光以後屢有京外大臣保薦知醫官員雖皆渥蒙優異然俱奉

旨隨同太醫院給事惟光宣年間大學士陸潤庠以輔弼大臣

特命請脈乃不隨同太醫院之後矣

考試

定制太醫院肄業生由本院堂官每年分四季考試於內經難經脈經本草經及各科要緊方書內出題作論分別等第申明禮部註冊每屆三年由禮部堂官來院考試取中者曰醫士不取者仍照常肄業以待再考順治九年禮部奏准醫士四十名月給銀米

在院供事糧生二十名供繕寫由是凡肄業一年以上且季考三次一等者遇有糧生缺出籤掣申明禮部充補遇有醫士缺出即以糧生籤掣申明禮部充補不復考取舊制醫士未授吏目職以前每月在教習廳交課二藝改籤補之後醫士糧生均依此例仍隨四季考試同治五年改設醫學館後改四季考為二季仲春仲秋為之凡交月課之醫士恩糧生肄業生統由堂官面考二藝出題多本醫宗金鑑傷寒論金匱要略間用內經難經每屆寅申年本院院使院

判會同禮部堂官除御醫毋庸考試外所有吏目以下各員生均一律會考備卷受卷均由收掌官批閱由教習評定等第由本院堂官封送禮部覆勘到院拆封咨行吏禮部註冊遇有應升缺出咨行吏部查核由院奏咨補用凡考取一二等者如無處分事故按名挨次擬補三等者照舊供職暫停升轉四等者罰停會考一次不列等者革職留院效力下屆仍准入考此同治五年禮部會同太醫院奏定章程也考章附後

一考試出題務須明白顯亮不得割裂經文批語
亦宜從簡質

一試卷務照定式置辦不得長短不齊卷面上印
太醫院字樣中填某班即醫士醫生各名目下
粘浮簽接縫用教習廳印卷面用堂印考前由
收掌官分正大光明四字填簿照號填卷摺疊
彌封再用教習廳印浮簽楷書姓名旁填坐號
仍鈐教習廳印半在卷半在簽用印畢將號簿
固封首領廳於需用卷外不得多備一卷

一考試日各員生黎明齊集聽候點名照號入座
臨點不到者扣除

一入座後由稽察官逐號詳查其有籤坐不符者
立即扶出

一題紙亦按正大光明分號粘懸明白大書使諸
生一覽無遺概不准離坐抄題

一出題後限時由稽察官挨號蓋戳其尚未得句
者印蓋卷面不錄

一統限日落交卷不准繼燭

一交卷自行揭去浮籤

一題目字句不得錯落謄真不得行草塗抹不得至百字不得越幅曳白油墨污

一教習閱卷只用句圈句點不許濃圈密點收掌均分呈堂批定

又康熙二十一年禮部奏准近年太醫院咨送本衙門肄業生員考試或監生或并非監生冒人監生姓名入場考試者皆由不在本省起文無憑稽察嗣後太醫院及各館有應考舉之生監俱令各該院該館

具題移送到日准其考試按此條亦係考試事故附載於此

又本院於光緒三十一年奏辦招考俊秀以恩糧用諸生以醫士用舉人以九品吏目用不過偶一為之不為常例

又本院光緒三十四年奏設之新醫學館一切考試均與學部奏定中學堂考試章程同茲不復贅

升遷除授

太醫院院使員缺由左右院判升補左院判員缺由

右院判轉補或由御醫升補右院判員缺由御醫升補御醫員缺由七品吏目升補七品吏目員缺由八品吏目升補八品吏目員缺由醫士升補醫士員缺由恩糧生除授舊制太常寺丞鴻臚寺寺丞以下官欽天監太醫院官員升轉俱由各該衙門呈送禮部轉咨吏部於單月題補順治五年定太醫院官缺由禮部奏補仍咨吏部註冊九年定太醫院院使院判員缺由本院自行奏補乾隆九年以後堂司各官缺均由本院自行奏咨補授如遇院使缺出將左右院

判開單請

旨因放左院判缺出則列右院判各御醫為兩單右院判缺出僅列御醫一單請

旨因放御醫吏目缺出舊例由本院堂官將內直勤勞之應升者出具切實考語申部題授如內直應升無人方將外直應升各官按俸次開列乾隆九年以後凡御醫八九品吏目缺出應升各員合班開列嘉慶道光時兩次奉

旨申明務將全班開單呈覽同治五年奏定除院使院判

缺照舊奏補其御醫八九品吏目缺出以會考名次為應升之員擬正其次者擬陪咨行吏部查核後由本院開單具奏請

旨國放如奉

硃筆國放擬正則擬陪者作為記名專待升補不再會考如未經擬陪雖考取在前亦於下屆考試日註銷即因事不考舊名次亦不隨帶醫士恩糧之缺照吏目缺一體辦理惟不入奏以吏部覆文到院之日為補缺日期雖仍由本院堂官定期補放不過沿依舊制

而吏戶部扣計仍以文到日期為定宣統元年以後醫士改為實官而補缺仍依咨案其各員缺有奉用者遵

旨特理有另案奏保者亦各依定章辦理同治年間奏定旨辦八品吏目俸滿以按察司經歷州判咨部在任候選九品吏目俸滿以縣丞府經歷咨部在任候選亦得開缺歸部候選光緒三十年本院奏准御醫六年俸滿及

京察一等者由院咨部註冊以主事在任候選八九品

吏目俸滿仍照舊章辦理其

京察一等者准其隨時呈請掣定一項分省候補餘與各部院官制同者見吏部則例又御醫以下各員如有差使脫誤醫學荒疏者由本院即時咨行吏部停其升轉俟查其當差勤慎學業有成即由本院堂官出具切實考語咨部註銷停升字樣

又順治十五年題准太醫院官升至院使只加京官職銜仍掌院事然亦不得逾正二品

又癸亥八月院使趙文魁以花翎二品晉給頭品頂

戴

章服

國初太醫院醫生章服視生員醫士視舉人順治四年
特簡醫士入直給與八品筆帖式冠帶康熙九年題准考
滿已停御醫吏目升轉無期許服六品冠帶十年奉
上諭太醫院御醫准其服用六品冠帶原品給俸其吏目
各員仍俟擇尤賞給不得援以為例雍正七年奉
旨御醫著定為正七品六品冠帶并准其服用貂皮挂數
珠八年奉

旨定醫士九品冠服與實缺官一體加級給封乾隆三年奉

旨凡進內當差之醫官著一體挂數珠并准戴貂帽其餘頂戴銜翎衣服坐褥與各京官制同

俸祿

國初定在京文武官俸俱按品級支給其俸銀滿漢一律頒發俸米滿蒙漢軍官每俸銀一兩支米一斛漢官不論品俱歲支米十二石每年春秋二季支給旋改滿漢一律支領米石其數目詳列於後

恩俸亦如之

正從一品歲給俸銀一百八十兩二品一百五十五兩三品一百三十兩四品一百五兩五品八十兩六品六十兩七品四十五兩八品四十兩正九品三十兩一錢一分四釐從九品三十一兩五錢二分

又直堂直廳歲給銀十兩太醫院十名

又順治二年定各衙門官員分別等次每月支給公費銀有差纂修書史官員加倍支給公費按京官公費久已改領錢文太醫院院使院判月四串八百御

醫吏目醫士月二串四百太醫院醫士順治九年定
每名按四季給銀四兩五錢米一石八斗雍正八年
改給二石七斗糧生舊定季銀三兩米一石二斗雍
正八年改給季銀六兩切造醫生舊定季銀一兩五
錢米一石五斗雍正八年改給季銀三兩

咨調刑部醫士每名每半年給銀二十四兩米二石
四斗盛京刑部醫士照京城刑部例支給

按京官俸銀自咸豐兵燹以後屢改四成五成六成
七成不等俸米改五成三成五分三成二成五分二

成各部院皆同

按公費自咸豐後改領五成當十錢實作制錢十分之一光緒二十六年以後竟裁之各部院同

按醫士李銀亦屢改五成七成不等光緒二十四年十二月始經本院奏准將醫士恩糧切造醫生應得銀兩由五成還歸十成二十六年後又改七成其米自咸豐年醫士者畧折些微之銀光緒二十六年以後亦竟裁之其恩糧切造之米久於咸豐年停放無著

光緒三十二年正月十七日軍機大臣面奉

諭旨著戶部每節交進銀二萬兩備賞內廷當差各項人員單開應領各衙門大門侍衛散秩大臣內務府南書房翰林太醫院鑾儀衛批本處奏事官奏蒙古事務侍衛如意館旋經內務府大臣奏定太醫院院使院判每節賞銀各一百五十兩御醫各六十兩兩班吏目各三十兩醫士各十兩恩糧生各四兩五錢迄宣統三年停放

光緒三十三年十月二十一日本院奏請

賞給辦公津貼請由三十四年起歲支銀一萬兩分四季
由部支領本日奉

旨依議經本院奏定以三千捐辦新醫學館以七千作為
辦公經費宣統三年停領

又癸丑五月以內帑不敷支放所有入直醫官之節
賞奉

旨改由廣儲司銀庫發給
欽定有差

又乙卯春經內務府奏准供奉各官三節酌給津貼

太醫院所領之數如光緒三十二年正月所定者然以銀兩改發銀元不過三之二耳

考滿

崇德八年定各官考滿如直辦事勤慎考註一等二等者雖有小過亦准加授官爵順治二年定鴻臚寺鳴贊國子監典簿太常寺各雜職欽天監太醫院官考滿毋庸具題俱由該衙門堂官考核咨送吏部都察院覆考註冊五年定太醫院官三年考滿申明禮部勤勞稱職者特咨吏部照例請叙酌量加銜八年

議准欽天監太常寺太醫院官九年考滿有缺升任
無缺升俸二級各小京職舊例歷俸二年遇應升請
按俸題補康熙元年題准查照考滿等第升授二年
定鴻臚寺鳴贊國子監典簿等官及太常寺雜職欽
天監太醫院官九年內考滿三次俱一等者將二次
考滿各准紀錄一次給表緞外其第三次考滿升俸
一級仍給表緞四年停止考滿專事

京察是年定京官升轉停止考滿仍照舊例論俸九年
題准考滿已停太醫院御醫吏目升轉無期許服六

品冠帶仍照原品支俸

京察

康熙四年定停止考滿專事

京察是年定太醫院官

京察由該院正官考核申送禮部禮部送吏部都察院
覆考舊制

京察時大小各官俱暫停升轉候事畢出榜後照常舉
行又吏部封門後科抄中有應處分各官亦俟

京察事畢查議按此二條係順治十三年所議准是年

復申明之康熙十三年奏定太醫院

察除院使院判例在京堂中引

京御醫吏目之一等者免帶引

見其正三年定太醫院官於

見雍察時應造冊自咨呈吏部都察院仍令造冊另呈禮

京部乾隆十七年奉

旨太醫院奏簡員缺務遵定章將京察一等人員簽註明
晰其非奏明請假者仍照舊開列同治五年以後太
醫院官升遷專依會考名次其

大醫署院制
京察一等人員已歸虛名光緒二十八年御醫懸缺應升無人經吏部議令以

京察一等者擬正請簡嗣後仍不得援以為例光緒三十年本院奏定御醫吏目

京察一等者別有升途見升遷除授條

衙署公所

太醫院署建於明之永樂年間在闕東欽天監之南西向門三對門有照壁朱色立額黑漆太醫院三字隨門左右環以羣房為門役住所左為土地祠北向

右為聽差處南向聽差處東北隅有井一元二門三左右旁門二隨門環以羣房北者為蕭曹祠南者為科房直接二門有甬路過宜門平臺臺右置鐵雲牌大堂五間堂內恭懸

聖祖仁皇帝御製賜院判黃運詩其詩云神聖豈能在調方最近情存誠慎藥性仁術盡平生地板為乾隆時所特賜大堂之左有南廳三間西向為御醫辦公之所堂壁立有石碑三通皆記

特恩者也大堂之右有北廳三間西向為吏目辦公之所

堂壁懸有紙屏八幅幅繪馬八匹共六十四匹為吏目陶起麟所繪道光年間無人經理霉爛無存矣南廊房為醫士廳恩糧廳效力廳皆北向北廊房為首領廳教習廳皆南向北廳之北為藏書處承接大堂之過廳為二堂後有三堂五間

純廟御書堂額曰誠慎堂為本院堂官辦公之所堂前種竹數百竿南有廚房茶房北為廟公所誠慎堂之南為板庫三堂後西向柵門內即

先醫廟趾北有垂花門三曰咸濟門為

先醫廟正門門之極南有焚帛爐北向東有打牲亭亭後東北有井咸濟門內石築丹陛北接正殿之平臺正殿立額曰

景惠殿殿內有

聖祖御書永濟羣生額殿前松柏高聳皆數百年物也東西兩廡各三間西北有門通公所焚帛爐之後有藥王廟北向殿宇三間亦北向附供

碧霞元君暨各

聖母像殿中立古銅人即所謂之銅神者此東南東北

均有皂役住廬再東則為生藥庫庫中有庫神堂土地殿道光以後藥庫作廢署後之地半為民房所侵光緒二十六年以後全部劃歸俄使館假東安門內大街御醫白文壽住房為公所二十七年僦東安門北池子街大悲觀音院為公所御醫顧元灝曾有詩云何事人間滿目瘡當年曾作殿中醫方欣院署依然在爭奈題名是大悲嗣查地安門外東皇城根兵仗局東有內務抄產一區足敷建設新署附右有吉祥寺空地一段商允住持僧智法以為改建

先醫廟二十八年正月指地奏請蒙准飭工建築三年乃成門三外設轄護木隨門有房西為聽差茶房東為科房東有土地祠一間西向西有銅神廟一間東向宜門內東西廳各五間為御醫以下各官辦公之所北即大堂堂前平臺設鐵雲牌日晷堂後屏門內為二堂三間仍名誠慎堂東房三間首領廳西房三間醫學館東耳房二間為庶務處西耳房二間為教習室此後仍有北羣房為諸生自修室東隅有廚房聽差房大堂之東有井西北為

先醫廟正殿有

德宗御書扁額較之舊署固是具體而微以方丈計之十之一耳光緒十五年後

聖駕時駐三海太醫院於西苑門南乞地一隅官為建房一所僅五六間曰外值房京西

圓明園為

皇上離宮駐蹕時則醫官隨侍入直園之東南地名一畝園有太醫院

御賜公所一區計東西二所以西所為

三皇殿東所為大堂計房八十餘間大堂有院使李德宣題扁曰春臺尺五光緒十八年

景廟奉

慈禧太后駐

頤和園太醫院官隨侍入直蒙

賞在大宮門外建築公所熱河本古之木蘭地有

行宮曰

避暑山莊早年

皇上巡幸醫官隨扈由本院籌款在

行宮左近置有民房以為公所至今太醫院署存有印契

先醫廟制

先醫廟者古之三皇廟也明初仍元制歲以三月三日九月九日通祀

三皇洪武元年令以太牢祀二年命以句芒祝融風后力牧左右配俞跗桐君仇貨季少師雷公鬼臾區伯高岐伯少俞高陽十大名醫從祀儀同釋奠四年帝以天下郡邑通祀三皇為續禮臣議唐玄宗嘗立三皇五帝廟於京師至元成宗時乃立三皇廟於府州縣

春秋通祀而以醫藥主之甚非禮也帝曰三皇繼天立極開萬世教化之原泊於醫師可乎命天下郡縣毋得褻祀正德十一年立

伏羲氏廟於秦州秦州古成紀地從巡按御史馮時雄奏也嘉靖間建

三皇廟於太醫院北名

景惠殿中奉

三皇及四配兩廡從祀歷代先醫歲仲春秋上甲日禮部堂上官行禮太醫院堂上官二員分獻用少牢二十

一年帝以規制湫隘命拓其廟清初仍之順治三年定祀以太牢乾隆年間奏定歷代

帝王廟制奉

上諭三皇開教立化功德與天無極就醫藥而論窮極天理洞徹人生垂萬世壽民之仁太醫院之

三皇廟著定名

先醫廟旋經禮部奏定雖改廟名仍應雙檮書寫

昭穆次序

先醫廟神位次序一依明世宗之欽定者也

景惠殿之中奉

太昊伏羲氏中之左

炎帝神農氏中之右

黃帝軒轅氏神牌之後仍有鑄銅敷金之

三皇像以上皆南向句芒風后配於左西向祝融力牧配
於右東向東廡則饒貨季岐伯伯高鬼史區俞跗少
師桐君雷公馬師皇伊尹扁鵲淳于意張機西廡則
華佗王叔和皇甫謐葛洪巢元方孫思邈韋慈藏王
冰錢乙朱肱李杲劉完素張元素朱彥修乾隆年間

特命儒臣會同禮部更定

先醫廟昭穆次序奏定以僦貸李天師岐伯伯高少師太
乙雷公伊尹華陀巢元方皇甫謐倉公淳于意藥王
韋慈藏錢乙劉完素李杲十四人從祀於東廡以魁
史區俞跗少俞桐君馬師皇神應王扁鵲張機王叔
和抱朴子葛洪真人孫思邈啟玄子王冰朱肱張元
素朱彥修十四人從祀於西廡

祭禮畧

國初定祭

三皇之禮與明制同先期由太常寺分咨禮部太醫院行
取現無事故之堂官銜名由寺題派并咨先祿寺備
辦祭品正殿

三皇三案四配二案正用俎以牛羊豕配用俎以羊豕所
用簠簋爵登銅豆均銅質銅尊高尺餘兩耳為犧另
有杓竹邊髹朱漆裏正殿供酒以爵兩廡以白瓷琖
帛織篆文曰禮神之帛兩廡以素帛祝版用白絹緣
黃綾清字贊禮引贊讀祝皆清語樂用慶神歡至祭
分獻以次凡太常寺先祿寺樂部暨太醫院陪祀各

司官皆朝衣朝冠補袪披肩挂數珠凡祭

先醫前期一日由本院駐署官一員冠帶珠補率廟戶焚香行禮拂拭殿宇懸挂龕衣大堂設齋戒牌主祭分獻各大臣於邸第齋戒各司官均在廟齋宿大門宜門均前期開正門以迎內閣之祝版亭雍正十三年議准春秋致祭先醫令御醫吏目一律陪祀

聖濟殿

聖濟殿者亦明世宗嘉靖年間之所建也在大內

文華殿後以祀

先醫春秋致祭以太醫官主之國初承其舊旋以
三皇已祀於

傳心殿則聖濟殿之祀專為報享

先醫令將神像暨銅人皆移於太醫入直之東藥房以
聖濟殿遺址改建

文淵閣

藥王廟

太醫院所奉之藥王亦畫像

三皇也左右配以十大名醫署後者制亦如之此外東西

藥房

圓明園一畝園公所

頤和園公所熱河

避暑山莊公所皆同其

乾清宮御藥房

寧壽宮壽藥房

壽康宮壽藥房

壽安宮壽藥房每直朔望醫官皆焚香行禮然在

宮禁不以太醫主祀茲不詳載

銅神

太醫院署 藥王廟香案前立有范銅之銅人周身之穴畢具注以楷字分寸不少移較之印於書繪於圖者至詳且盡為鍼灸之模範醫學之儀型也鑄於明之正統年光緒二十六年聯軍入北京為俄軍所有

先醫廟之鑄銅

三皇像亦為俄軍所得和議後經御醫陳守忠委屈周折始將神像由俄之駐華營迎回銅人則據為奇物不

肯交矣經陳守忠懇准太醫院堂官奏給俄武官二
等第三寶星以酬之嗣改建新署隨工復置銅人由
堂派醫士蘇秉鈞候補吏目張慶雲為監造東藥房
藥王殿之銅人鑄於明嘉靖年惟其質略小餘與本
院署中者同以醫林咸師其穴不呼銅人而稱為銅
神

土地祠

太醫院署有土地祠生藥庫復有土地祠庫內土地
祠僅殿一間塑像藍袍左右二僮署中土地祠在大

門內北向門外有照壁內有南殿三間塑以錦袍坐像前列牌位題為明太醫徐鑒之神有謂徐為明之忠臣故後署中人附祀於土地祠或謂國初奏請簡放明之忠烈為本署之土神者既未見於記載不敢妄指惟徐鑒確有其人而太醫院諸前達相傳不一迨至光緒二十九年塑像新署適符八十老人退居林泉之象并非監修者有所成見不過偶與史傳暗合耳然其事跡足垂後世宣統二年御醫任錫庚在七品吏目任內曾充駐署官乃摘明史題於土地祠

之左壁以誌徐公之德其題曰

考明史夏良勝傳附載徐鏊嘉定人本高氏子少孤
依舅京師冒徐姓從其業為醫以醫士供事內殿正
德時南巡詔下繼良勝舒芬等具疏以其術諫略言
養身之道猶置燭然室閉之則堅風暴之則淚陛下
輕萬乘習嬉娛躍馬操弓捕魚玩獸適復不憚遠遊
冒寒暑涉關河膳飲不調銷菽無擇誠非養生道也
况南方卑溼尤易致病乞念宗廟社稷之重勿事鞍
馬勿過醉飽喜無傷心怒無傷肝德無傷腎勞無傷

牌就密室之安達暴風之禍臣不勝至願疏入帝與
諸侍臣皆大怒遂下鑒詔獄俄令跪闕下五日加桎
梏焉至晚仍繫獄晨入暮出累累若重囚遙觀者無
不泣下跪既畢杖五十戍烏撒而車駕亦不復出矣
世宗即位召還尋擢御醫鑒性耿介時朝士多新貴
不知鑒鑒亦不言前事一官垂三十年不調年七十
求致仕值同縣徐學謨為禮部郎中引見尚書吳山
山閱牘有諫而巡事瞿然曰此武廟時徐先生耶何
淹也兩侍郎嫌其老學謨抗聲曰鑒雖老然少與舒

狀元同患難為可敬耳又久之始遷院判自引歸卒
年八十三

按烏撒即貴州舊大定府威寧州地

甲寅仲春却秩家居日事筆墨以資消閒所著難經
筆記既經呈送內教二部立案復蒙太醫院管院大
臣張午樵佟質夫二夫子奏進經

毓慶宮大臣閱看得

旨留覽文俗識淺

睿鑒奚榮其鼠疫辨畧舌苔志驗醫宗簡要小牕磨墨修
身如此明辨錄河洛數枯竹籟合掌數祭器歌等作
從未示人癸亥花朝同人集中醫學社謬承社長全
誠齋袁琴舫二先生推為編輯主任是秋假

內府之板刷印醫統正脈若干部造福蒼生端賴諸君
庚無與焉乃名譽社長太醫院長趙公迫以所輯之
太醫院志就付手民俾修

清史者采擇之聊題書後以志

任錫庚又書

太醫院同寅錄

花翎三品頂戴督辦清察管理太醫院事務張仲元

午樵

花翎三品頂戴協辦清察管理太醫院事務佟文斌

質夫

花翎頭品頂戴總管太醫院兼管御藥房御藥庫事務太醫院院使趙文魁

友琴

四品頂戴太醫院左院判鄭敏書

慎之

三品銜太醫院右院判范一梅

壽臣

御醫全順誠齋

張惟寅

子清

張德樞

子蕃

翟寶全

子安

任錫庚

修如

袁其銘

榮舫

佟成海

濯泉

何繼德

泰方

王文元

翰卿

七品吏目馮淮清 秋平

郭錫章 紫封

吳廷耀 煥臣

莊壽山 懋堂

董文清 子彬

董啟儒 克臣

八品吏目楊世芬 菊農

楊世葆 心源

劉文英 翰臣

范承順 煥章

瞿書源 文樓

何廷俊 傑臣

蘇施霖 恩溥

李景福 益三

九品醫士梁福恩 壽臣

王文成 質卿

姚貴榮 文卿

周豐禹 川

白永祥 瑞堂

栗玉振 聲甫

馮懷寬 濟卿

李培庠 秀升

恩糧陳鑑 鏡蓉

韓善長 一齋

壽徵 驥超

郭泮芹 蔭燕

范懋功 仲文

王澤澎 鴻放

王大濟 沈東

鄭啟彬

馮樹勛 健儒

朱曾煜 星橋

朱殿華 佩寶

鈕子鏡

王圻 希臣

張英濤 友松

孫煜曾 士惟

殷承緒 繼川

肄業 聖陳爾康

周融 慕新

候補御醫郭榮 曉山

李錫璋 藝林

艾世新 輔臣

王繼曾 紹武

候補七品吏目朱曾潤 雨田 馮盛化 雨亭 閻榮海 什州

王治寬 蓋臣 吳錫光 壽臣 胡溥源 靜泉

張連元 仲三

候補八品吏目李 振 顯臣 楊得山 峻峰 徐起霖 雨蒼

羅增壽

候補醫士張鶴書 暢齋 崔敬修 筱軒 廣 琦 潔田

張瑞恩 子和 張彭壽 福延 吳錫明 月川

趙進嘉 子琪 王德續 述堯 劉乙然 星皆

馮之驥 戴之 孫秀巖 瑞峯 戴貽麟

陸寶善伯純

王澄濱竹泉

白毓良樂民

王文魁仲達

程煦

吉勒罕暢秋

劉仲祺

常山仁甫

劉富年

候補恩糧郭志義品卿

王常明旭初

梅夢松仲蘭

閻守慶壽卿

尹振昌世五

馮則敬公甫

王慶麟

朱玉崑

上藥房值宿供奉官

張仲元 佟文斌 趙文魁 范一梅

佟成海 李景福 王炘 王大濟

陳鑑 陳爾康

上藥房值宿司藥官

任錫庚 楊世芬 梁福恩 朱曾煜

孫煜曾 何廷俊 白永祥 蘇施霖

周融

壽藥房值宿供奉官

鄭敏書 張德樞 王文元 郭錫章

董啟儒 董文清 范承順 栗玉振

馮懷寬 韓善長 郭泮芹 張英濤

東藥房值宿供奉官

全順 張惟寅 袁其銘 何繼德

馮淮清 吳廷耀 楊世葆 劉文英

姚貴榮 王文成 李培庠 鄭啟彬

鈕子鏡 馮樹勛 王澤澎 壽徵

瞿書源 周豐 殷承緒 朱殿華

范懋功

首領廳 瞿寶全 王文元

駐署官 莊壽山

御藥庫同寅錄

太醫院院使兼管御藥房御藥庫事務 趙文魁

掌

印 御

醫任錫庚

幫掌

印

御

醫佟成海

兼充庫掌八品吏目 劉文英

額設

主

事定保

筆

帖

式達齡

在堂行走筆帖式

續澤慶斌富潤

常齡富祿瑞光

德緒

幫辦庫掌催長順齡

候補領催祿康長富策政

廣智廣煥祥綬

文連寶豐奎靈

勅力柏唐阿永惠崇俊增義

候補筆帖式英趾增純盛連

廣林

繕

寫

延

昭

文

林

恩

發

恒

玉

榮

興

德

椿